

nostro. Scrive che turchi passono el fiume dil Danubio, di qual da' hongari fonno morti 2000. Da poi el conte Josa, capetanio dil exercito di hongari, passò el Danubio con X milia cavali, e il ducha Zuan Corvino, per altra via, andoe; e fonno a le man con turchi, dato rota de 1500. E scriveno essi capetani, esser reclusi in certo passo stretto 3000 turchi, che non potranno fuzer di non esser a le man con hongari; sì che tra l'horo farano gran cosse.

A dì 8. Per lettere di Cypro, di 2 octubrio, per la nave di sier Gasparo Malipiero, si ave dil brusar a Tripoli la nave di sier Zuan Barbarigo, di sier Antonio, di bote 500, con sachi 120 gotoni et 1050 cenere. E la causa fo, perchè 'l schalcho si domentichò la candela acesa, e quella brusò la nave; e fo gran danno et pocho si ha recuperato. *Item*, dice el patron di dita nave Malipiera, che trovano le galie de Baruto a Strivali e quelle di Alexandria a Corfù a dì 21 octubrio.

Et perchè se dubitava di la città di la Cania, se 'l turcho ussisse con armada a tempo novo, intreria in porto de la Suda, dove in uno arsalto pieria la terra, *maxime* hessendo li rector sier Zustignan Zustignan, vechio, ciecho, e mal sano, *unde*, a requisiton di sier Anzolo Permarin, orator di la Cania, fu preso in pregadi, elezer nel mazor consejo, per scurtinio et 4 man di election, far uno provedador a la Cania, con ducati 500 d'oro neti; e, compido averà el Zustignan, questo resta per retor li. Et cussi a dì 27 dito fo electo sier Nicolò Coppo; era ai X officij, *quondam* sier Giacomo; qual accettò et andoe. Ancora fo preso di armar X galie in Candia et seriver che elezino li sopracomiti, et si manderia li danari. Et voglio seriver quel fu aricordato, che saria bon che 'l rezimento di Candia facesse uno viril castelan a Temene, et meterli 400 homeni, e fornirlo di vituarie e artilarie; per bon rispetto.

*Etiam* fu preso in pregadi, elezer, per scurtinio et 4 man di eletion, uno provedador al Zante, in loco di sier Nicolò Marzello, era sopracomito, et per il zeneral Grimani fo messo li, el qual habi ducati 600 neti a l'anno, per spexe, per do anni; et la parte fo poi *etiam* balotata in gran consejo e presa a dì 21 dito. E fu eleto sier Vettor Michiel, fo capetanio in Alexandria, *quondam* sier Michiel, qual vene per eletiom et refudoe; e poi fu fato sier Piero Foscolo, *quondam* sier Hironimo, stato *alias* provedador al Zante; accettò et andoe.

Et perchè a la impresa turchescha *etiam* era bon aver ajuto dal re de Ingallera, perhò in pregadi fu preso, che sier Francesco Capelo, el cavalier, era an-

dato con li altri do orator in Franza, e lui restava in loco di sier Francesco Foscarei, el cavalier, che debbi ditto Capello subito andar in Ingallera, a inanimar quel re a la impresa contra turchi; et che sier Domenego Trivixan, el cavalier, e sier Hironimo Donado, dotor, oratori, restino a presso il re di Franza fino li serà ordinato altro, *licet* havesseno il tempo statuito di congratularsi col re di l'aquisto di Napoli, e ritornaseno, perchè *quæ de novo emergunt de novo indigent auxilia*. Et perchè la città di Padoa non rimanesse senza pretor, *licet* l'oficio li saria servato, parse a sier Domenego Trivixan, el cavalier, era podestà, di refudar, perchè sapeva ben dover star qualche zorno in Franza; perhò, a dì 14 novembrio, fo electo podestà di Padoa sier Tomà Mocenigo, el consier, di sier Nicolò, procurator, el qual è in gran fama per esser stà governador di l'intrade.

A dì 14 dito. Nel mazor consejo fu posto parte, per i consieri, di far zenthilomo nostro monsignor di Chiamon, gran maistro di Franza, hora governador di Milan, e nepote dil cardinal Roan, el qual, per sue lettere, cussi richiese. Et ave, de sì 1109, de no 22, et non sinceri 6; et li fo mandà el privilegio.

*Item*, el cardinal Roan si parti da Milan e passò i monti, per andar dal *roy*; e, fin stete in Milan, a fato optima justicia a tutti, acciò quelli populi sia benivoli al *roy*.

In questi giorni vene legato in questa terra domino Francesco de Montibus, per nome dil re di romani, qual *alias* era orator dil re Fedrico a presso ditto re; et vene a dimandar il resto di ducati 6000, dice il re li avanza, quando el vene a Pisa. Al qual fo dato bone parole et si parti; ma, soto specie di questo, voleva aver inteligentia con la Signoria nostra.

El conte di Pitiano, stato fin hora in Friul con le zente, dimandò licentia di venir a Venetia e li fo data. È da saper, che Tiphis, colateral vice, era a Padoa, in questi di par scrivesse 40 cavali in la condotta di Zuan Paulo Manfron, *absque licentia*, *unde* per sier Nicolò Foscarini, capetanio, fu casso.

A Roma morite in questo tempo el signor Zuan Rovere, fratello dil cardinal San Piero *in Vincula*, prefeto di Roma, signor di Sinigaja, *etc.*, e lassò alcuni fioli e la moglie, qual è sorela dil ducha Guido di Urbino.

In questi zorni si parti sier Zuan Badoer, dotor et cavalier, va orator in Hongaria, al qual fo dato la commissione a inanimar quel re contra turchi, et